

榆次縣志

孝慈常地春  
書首



榆次縣志卷十五

名宦錄

榆次號稱劇邑幅員既廣兼顧實難加之北則什貼西則鳴謙迤南永康並爲由京奉使而出如省如秦隴川滇諸孔道以故館舍之備芻秣之供無敢不給而徭役科派滋焉近河水利鄉愚競爭或出門很而測勘訊案煩焉如是而責以事功要諸治效殆亦戛戛乎難哉雖然本諸實心出以毅力明察詳審於事亦可徵其效也茲之所錄類皆人民樂道垂諸口碑者彙而述之至於前賢宦蹟之已載入舊志者亦並爲採錄俾後之爲政者知所鑑焉

榆次縣志

卷十五 名宦錄 春秋晉唐

一

春秋

知徐吾知盈之孫魏獻子爲晉國之政以徐吾爲涂水大夫謂徐吾餘子之不失職能守業者也

錄舊志

晉

荀藐咸寧中爲榆次令以德教爲政民咸懷之咸寧二年六月鳳集其境時以爲政化所感武帝下詔褒美之其辭云就之如日月敬之如神明愛之如父母樂之如時雨今縣南有荀政鄉蓋藐去官而民思其德故名焉

錄舊志

唐

孫湛貞觀中令榆次引洞渦水西流溉田居民利之政以嚴稱吏

帖然不敢肆

錄舊志

北漢

盧守忠劉氏據太原時爲榆次丞時北漢地蹙國貧屢被攻討力不能支北漢主旻聞榆次有富家數姓貲各鉅萬潛命守忠籍取之以爲軍資守忠力言不可旻怒將召而殺焉守忠曰非爲富人乃爲國耳今籍取無罪人心爭離敵兵且至必爲倒戈之舉矣旻乃止人賴以全後宋太宗平劉氏微聞其事命予守忠官卒以病辭守忠丞相多遜之叔也

錄舊志

宋

文彥博天聖中以殿中丞署縣事作思鳳亭賦詩以記其事至今

榆次縣志

卷十五 名宦錄 唐北漢宋

二

傳焉初第進士知翼城縣通判潞州遷殿中侍御史其署榆次當在通判潞州時也後任有吳天常者來爲令亦有聲歐陽修仁宗慶歷中以知諫院奉使河東薦州縣材幹可用者九人天常與焉

錄舊志

桑安世紹聖中知縣事課農桑教民務本引澗河水曲折數十里以溉民田惠利久而不竭後唐恪於元符中來爲令亦以政治

稱 錄舊志

盛子思崇甯中知縣事持身廉慎文行政事皆可師法秩滿去官

邑人常思之

錄舊志

李諒宣和初知榆次兼管兵馬司事性平恕政尚寬簡以良史稱

吏

嘗作思政堂自爲之記今不傳

錄舊志

金

楊伯元大定二年進士自鄆城主簿遷榆次縣令有惠政

錄舊志

李好復明昌初進士爲榆次令時金方多故河北山西兵飢相洊

好復到官安集流逋剪撲盜民賴以安

錄舊志

元

張儉延祐中自秀容主簿擢尹榆次爲政能以善導人旁邑訟有

不直者皆來質成邑中刻石以紀遺愛禮部尚書潘昂霄爲撰

辭焉

錄舊志

侯洪舉進士爲離石判官泰定時尹榆次廉直無私遇事立決雖

榆次縣志

卷十五 名宦錄 金元明

三

簿書纖悉不遺及去秩邑人刻石頌之元統中大名齊思恭自

國子助教來爲尹蒞政嚴明豪猾斂跡與洪治狀相亞焉

錄舊志

程克明至元二年爲縣尹甫下車卽詢民瘼屢行惠政值歲饑發

邑中大姓所積粟以賑貧民藉以活者凡數千人

錄舊志

劉鏞至正四年自秘書監出尹榆次以儒術飾吏事剖決如流時

巨寇劉入忽等自陝至潛出邑境鏞覺其有異收之果伏人以

爲神

錄舊志

明

姚翥直隸永平人洪武三十年知榆次縣事公廉勤恪善政多端

任旣滿民戀戀不忍其去永樂初有劉俊者淮安人政理詳明

治榆末期年而頌聲作

錄舊志

劉震河南洛陽人景泰七年任縣事撫人以恩慎於刑獄豪強讐服盜賊感化皆爲良民焉

錄舊志

宋信直隸趙州人成化五年以舉人知邑事有清操不事鞭撲弛

張中理境內大治

錄舊志

梁琮直隸蠡縣人成化二十二年以舉人知縣事貌古樸言呐呐

如不能出口彊毅有爲縣政畢舉考績爲諸邑冠

錄舊志

張鐸陝西人弘治六年以舉人任縣事持身清介視事畢閉門謝客竿牘者不得入政平訟簡吏民皆懷之尋改官嵐縣遮道攀留涕泣者數千人繼鐸任者爲張鑑政亦與民宜鑑河間舉人

榆次縣志

卷十五 名宦錄明

四

也弘治中知縣事者又有蠡縣舉人崔岑理煩治劇敏於幹濟

人稱其能

錄舊志

蘇民陝西人登進士以正德元年知縣事爲政務大體不事苛察

民有犯者先以理論之不從始繩以法公暇輒召諸生親爲講

論由是士皆奮起優於文行者極多

錄舊志

鄭德崇山東汶上人登進士正德六年任縣事性簡重不以刑威

督責而吏民服其清整

錄舊志

張穆直隸完縣人以舉人任縣事達政理峻丰裁抑侵漁剔浮蠹

民以蘇息士有貧不能婚者出俸以資之後覲京師卒於道士

民百望哭以祭焉

錄舊志

陳悃陝西人亦以舉人任縣事謹廉隅杜餉遺人不敢干以私抑  
豪強屏貪蠹理冤枉明察沈斷莫能撓奪久之吏皆勤廉而民  
識禮讓治行之善如古循吏云

錄舊志

尹倫河南汝州人登進士嘉靖元年來知邑事至誠御物人不忍  
欺值大水請蠲賦以惠民設隄防以禦漲至今賴其利後有山  
東舉人辛樂治尚清嚴陝西進士俞鸞寬猛得宜邑中廢墜多

所修舉

錄舊志

王宮用直隸成安人登進士嘉靖中知縣事前令或有尚操切者  
吏民多稱不便宮用至獨馭以寬和而事皆就理邑無逋賦訟  
者稱平先是邑有木棉稅年稅千金令多私有之宮用盡以歸

榆次縣志

卷十五 名宦錄明

五

公其清白如此

錄舊志

黃緯山東益都人嘉靖三十八年蒞任四十年邑大旱民饑盜賊  
並起緯嚴治之而請於郡守停賦加賑遺愛至數十年不忘

錄

舊志

蕭大亨山東泰安人以進士於嘉靖四十一年選知榆次縣事時  
歲屢荒民多轉死大亨至首請上官發倉以賑之撫卹其存者  
榜招流亡使還復業時不雨且五月大亨潔齋出禱既而大雨  
一縣皆稔榆俗悍而喜訟大亨多方勸導其不悛者治以法無  
少貸由是鬥訐之風漸息邑中徭役不均富人巧規避而貧者  
多苦累大亨知其弊因編審盡革正之頌聲流聞上官以為能

檄令編鄰封數縣大亨一如編榆者編之父老皆撫手曰吾儕且老死幸得見賦役清平初大亨以南關郭垣土築而庠倉卒不足捍寇盜方議高其甃甃會遷官去後二十年以大司馬出鎮宣府大同仍移檄榆次令卒其功使高與城墻等縣人尤感

德弗置焉

錄舊志

姚德重山東濰縣人李光祖陝西保安人徐守謙河南洛陽人萬歷中皆以進士先後知縣事德重自奉儉事上恭寬以待人而嚴於馭吏光祖性慈祥濟以嚴毅萬歷十四年邑大裨光祖止徵役減獄訟發倉爲粥以食餓者全活不可勝計守謙果斷明肅剖決如流屢舉卓異邑人並立碑記焉

錄舊志

榆次縣志

卷十五 名宦錄明

六

張鶴騰河南潁川人萬歷中進士知縣事七年事無大小必周慎以處之值歲荒徧歷鄉落躬親區畫多方賑卹之邑人安焉明年春復借以牛種使得耕作人以其救荒有術比之宋富弼上官舉其治行爲三晉第一邑之牧豎婢媪皆德之以丁憂去行李蕭然惟圖書數卷而已鶴騰編審均徭凡輕重陞擦無一不當富者莫能規避貧者咸沾惠澤先是戶口黃冊十年一造舊今多聽之里胥往往指一科十大爲民累鶴騰計其所需歲派三十金儲以待用至十年合三百金用足而事給省緡錢無算既去五年民猶念念不忘樹碑立祠以祀邑人張國儒爲撰文稱之曰清則無求而民有餘蓄清則無擾而民有餘時清則無

苛而民有餘力夫民所患者不足也而公賜之以三有餘則羣然祀之於既去之後豈偶然也哉識者以國儒爲知言

錄舊志

史記事陝西渭南人初以進士知介休著聲蹟萬歷三十一年調任榆次記事爲令精明果斷而心專爲民其於利病之興除雖勞怨不顧方下車銳然更始凡猾胥姦駟梗政理者悉屏斥之未二年榆遂大治初縣中有渠二十五以溉民田當需水時強者或多兼併弱者至不克沾勺水之利恆爭訟無已記事爲立法於晉諸藩地定一月十八日使水畢餘則酌畝之多少勢之遠近而均派焉令強者不得獨擅人帖然服守之爲程又新開數渠灌田甚廣其不能渠灌者令民鑿井田間給穀以資其工

共成井八百七十有六以時灌溉而邑無旱災縣之東北鄉地瘠而賦與平壤等遇歲荒民卽流徙徙記事布令招徠每一家給穀五石驢二頭使墾荒地一百七十餘頃皆爲良田又作勸農書教民以耕牧之法復設鄉約二百十所擇民有齒德者朔望導諭鄉民使知孝悌立社倉二百處歲發穀四石仍從民便輸穀儲其中若大侵則聽民計口稱貸而貧者免償榆次故不產金時稅使方恣以威劫縣令歲徵金四十兩記事堅拒之稅使竟不能奪也旣而陞兵部主事奉詔行取雲南道監察御史去之日士民遮道攀轅留之不得絡繹奔送至數百里外仍建祠以報其功德記事後升光祿寺卿於萬歷末號稱名臣

錄舊志

王應楫山東安邱人萬歷三十三年以進士自徐溝調任榆次承張鶴騰史記事爲治之能守其法撫以慈和萬曆己酉大饑應楫設廠數十所爲粥賑哺傾俸錢市粟以給勸富者共輸至明年夏始罷全活不下萬人其後許宗禮胡權並有治聲而宗禮奏最第一榆次向無志初自邑祭酒閻樸尚書褚鉞行人張國儒繼之及張鶴騰爲令加裁訂焉至史記事續修未畢而遷官記事之後應楫與權並有功於縣志者

錄舊志

劉似鰲直隸高陽人萬歷癸丑進士初任平陽府聞喜縣有惠政調繁榆次益清節自勵爲邑人立小學數區延諸生爲師教其子弟開東陽鎮水渠溉田數十頃至今利之崇禎中江南興化

榆次縣志

卷十五 名宦錄明

八

人韓如愈以進士來知縣事善發奸摘伏其廉潔類似鰲云

錄

舊志

溫敬縣主簿也河南武安人由監生以宏治五年任職端潔不私爲士論所服而嘉靖中縣丞蕭環以明敏稱萬歷中縣丞張國俊以清操著李茂以明慎爲百姓所感皆榆吏之良也環監生涿州人俊亦監生山東博縣人茂陝西興平縣人由選貢任

錄

舊志

宇文鍾陝西乾洲人弘治九年以舉人署榆次教諭始至諸生以其年少咸心易之質以疑義隨問而決以文就正者因其高下爲加潤飾頃刻數十篇無有滯思諸生乃大服先鍾爲是官者

永樂時有歸德范宣言動可則景泰天順間有晉州舉人王恭  
富平舉人黨忠武功監生李得春恭教諭忘倦忠以造就人材  
爲己任得春嚴於自治諸生敬憚之又有新泰舉人成憲博覽  
羣書尤深於易後嘉靖中餘姚舉人徐元孝亦以能教士爲人  
所稱至天啓末而得何騰蛟焉騰蛟貴州籍實浙江山陰人論  
者以爲榆廣文之有騰蛟猶榆令之有文潞公云

錄舊志

清

楊三知直隸良鄉人明末進士清順治三年知縣事三知爲人負  
才略尚節義是時大同總兵姜瓖反遣兵攻太原府遂至榆次  
三知率士民登陴固守宿城上者六月賊不能勝始引去城賴

榆次縣志

卷十五 名宦錄 清

九

以完未幾陞神木兵備僉事瓖降而復叛以兵犯神木三知死

之贈光祿卿

錄舊志

王亦宣關東人隸正紅旗康熙三十七年任縣事方下車卽延見  
父老問邑中利害與民間疾苦初縣有鳴謙驛通京師秦蜀往  
來旗官駐防西邊歲更番過驛縣當給車牛供費不支則盡括  
民家視有車驢牛馬可任載負者籍記之俟其番代取以供送  
迎鄉民輟業遠來時日羈留多不勝困累而旗兵猶向民索錢  
不與往往肆笞暴民或至棄其車牛而遁吏見如此復因緣爲  
奸計其鄉之大小車牛之多寡而陰責其賂賂入則爲庇免而  
盡役其無賂請者縣編戶七十餘里舊設總理十人凡縣官公

私所需及無名之歛皆以命總理總理科於民十倍其數百姓重困非一日矣亦宣知其然呼吏出車牛簿焚之於衢而除去其所爲總理者以絕其根株徧曉縣人使共喻一切役費皆官自辦之無復更苦民民慶更生於是取無賴少年尤黠桀者治其罪而縣中蒲博羣鬥之風息居歲餘獄犴幾空亦宣之始至也年僅二十餘吏以其未習爲政不足憚旣而見所設施莫不畏服里民張正奇等因備刻亦宣禁令於石永示縣中昭其德焉

錄舊志

石鑑直隸衡水人雍正八年以舉人任縣事爲人樸厚居官不事聲譽而專於爲民事或不便百姓者數力爭上官前必得請乃

已故縣人謂鑑寬而能毅真我父母也雍正中方征準噶爾山西諸縣當買羸畜氈毯粟豆之屬送歸化城若河隴之外以供軍需他人辦者率爲民累鑑任其事先後十有七而榆人不知擾也鑑以強直愛民與上官左顧未有以去鑑者會鑑公出獄囚醉毆相殺因以爲鑑罪鑑之去也榆人祖餞者自縣北門至什貼沿途不絕甚有送至壽陽太安驛而後返者初鑑罷官有父老負二瓜求見且曰小人年七十餘未嘗至城市公真好官今且去恐終不得見故奔走來此時以若耶老人送劉寵比之鑑去後復有誣以在任侵稅錢者責令追償欲以困鑑鑑產遂破縣人聞之爭醵金千六百爲鑑贖百年以來令吾邑得民愛

戴不忘未有如鑑者

錢標江南武進人先以拔貢宰太原有聲遂於乾隆四年調榆次榆次稱煩劇邑當事人以非素循良優吏材者莫可任故特使標標之爲治酌寬猛而兼用之常欲使縣人無事曰庶幾令民得休息也始至承歲荒當賑標盡心爲之人多全活旣而修學宮植土類諸生貧苦者每周給之有孀婦王氏趙氏皆<sup>楚</sup>獨無倚告於標求託食養濟院標問知爲良民也心憫焉資之金使紡績自供嘗有官銀百兩當納於郡使隸齎往失於塗標驗其實卽代償勿責也治榆三年於河渠利民者尤拳拳盡心以最擢知朔州會病卒囊空無以葬邑人爲設位弔祭輸千金助喪

榆次縣志

卷十五 名宦錄 清

十一

歸江南

錄舊志

汪志伊安徽桐城人乾隆四十九年任縣事一以愛民爲心其遇事能斷如鏡之明故雖邑稱煩劇絕無留牘人皆謂非百里才邑東南鄉值荒歉創行救荒之策分上中下三等上戶出粟各分三等以次而減下戶受粟亦各分三等以次而增法良意美民沾實惠未幾陞代州牧有冤獄將行刑矣察知其冤白撫憲覆勘時以屍骨自隨防胥吏作奸卒得平反後任江蘇巡撫時屬吏多有以庫虧得罪者或死或譴其家屬流落無依深憫之爲請於朝迺得賜資斧遣還鄉里所著有荒政輯要刊行於世迄今所蒞之地人皆頌其德焉

錄舊志

鄒樹甯四川人嘉慶十四年任縣事廉明有斷才民皆悅服因辦  
差室悞落職生員李作樞協同士庶條陳政績叩閭請留上憐  
其能覈實復職後任朔州卒於官貧不能旋里邑人感其德捐  
資爲賻輦榿歸焉

錄舊志

顧麟趾陝西臨潼人由監生援例銓山西知縣道光元年調本邑  
廉潔自持嘗於夏月公出坐肩輿手揮塵尾人望之若仙考試  
文童文雖佳必詢知爲寒士有品者乃予以榜首歲旱禱雨龍  
王山步行數十里夜齋宿於廟歸仍步行雨隨至雖衣冠盡濡  
不恤也其聽訟一歸平允縣之太平莊人陳某在鳴謙鎮開設  
布鋪夜被人戕失布數疋適其子履襪有血痕且頑梗嗜賭睹前

數日經父訓飭語言頂撞挾忿去人皆疑其行逆訊之誣承然  
以子無須盜父物爲疑今住署內察其起居飲食若無事者且  
贓亦不獲獄久懸時上憲以逆案限期甚迫恐干嚴譴責以不  
用刑求乃終不爲然徐遣人物色布疋得於隣村典肆知爲某  
所當當後卽不復見踪跡至歸化城捕回一訊而服獄乃定後  
南關糶舖夜有數人撞門入揚言徐溝捕役捕盜起贓掠取財  
物若干並毆傷舖夥舖主張三愬於署關文徐溝以盜治捕役  
不少貸人服其威德後仕江西著山右讞獄記行於世

錄舊志

崔登雲清乾隆丁酉朔平府拔貢嘉慶四年署縣教諭時洪太史  
亮吉被譴戍新疆過縣陳署知縣日壽浙江人與洪爲庚子同

年謁候且厚贐夜登雲率諸生何郁曾等往謁辭以寢登雲曰  
得觀直臣風采願足矣請坐門外待曙以見洪急起延入何生  
時七十各携酒果及贐儀洪感其意略受之翌日行後受代而

去

按舊志宦蹟非責任者不列茲特重其誼本洪氏日記補述之

李寶箴直隸獻縣人以進士卽用分發山西光緒元年任縣事清  
操絕俗不妄取一錢暑內供給較前減數倍商民稱便爲治寬  
猛兼濟刁民猾胥懲之不稍貸事無大小必親剖決年餘以積  
瘁卒於任宦囊蕭然民輸千金始得返葬

錄舊志

張承熊陝西平利人咸豐戊午副榜光緒八年代理縣事到任後  
禮賢下士興學育才時論多之九年秋考院落成嘗自撰書楹

聯以勛多士聯以木製文筆犀利爲士林所傳誦聯云三更火  
五更鷄費幾許工夫看此際平地爲山進步纔如初覆簣百人  
俊千人英是何等氣概想他時長風破浪出身猶記試前茅

雷棣榮陝西朝邑人清同治甲戌進士以光緒十年任縣事不尚  
苛察而凡事必衷於理聽斷詞訟煦煦如家人人民均感其廉  
平邑中差徭紛繁自荒歉後茫無綜理乃詳加釐定督公和局  
諸紳按時報銷又城鄉油商因支差攤派不免失均乃釐剔弊  
端明定款目使無偏倚凡調任回任者四次始終不渝其清慎  
以二十三年卒於官

劉光煥北江夏人清同治癸酉舉人光緒二十八年署縣事明

於案牘不任刑錢訊斷案情亦無枉濫公餘讀書或爲詩詞如老諸生待士尤寬厚課試書院諸試卷親自批閱其寒畯且優加膏火獎賞以爲鼓勵值朝旨變法廢書院設學堂又爲寬籌經費以備興革未及設施調任臨汾臨去邑人士爲懸文教覃敷匾額於學堂以誌感念焉

周之驤直隸清苑人清光緒乙酉舉人光緒三十二年值吾邑新舊紳交鬩前知縣落職檄由徐溝縣兼理至則不事張皇務爲妥協會省委官紳到縣調解之驤準情視勢悉泯紛爭卒使高等初等兩小學合併改訂學章且舉設勸學所教育會在職乃僅逾月也

李兆慶江蘇丹陽人清光緒乙酉優貢以三十三年署縣事深感徭役之煩難每爲紳民言之至於垂涕卒釐訂章程勒石永定爲例又以賦稅積年拖欠整理爲難乃督飭櫃書認真收取終日危坐堂皇使民隱得以上達有訴訟者立予審斷民稱便焉又夏旱步行祈雨於源渦歸來雨作衣帽霑溼行泥中商家請循檐以避者曰專祈者雨也雨來敢避乎市民大感動

